



UNIVERSITÄTS-
BIBLIOTHEK
PADERBORN

Universitätsbibliothek Paderborn

**Constans Defensio, Ex S. Scriptvra, Et Vera Catholica
Doctrina, Atqve Observatione Vniuersalis Christianæ
Ecclesiæ Deliberationis de Christiana Reformatione**

Bucer, Martin

Genevae, 1613

De Reformatione monasteriorum 138

urn:nbn:de:hbz:466:1-34315

vlo pacto consentient, &c. sine vlla rationabilium causarum subiectione.

Ad hoc responderetur, Sacerdotes vna cum principalibus veteris populi Israëlitici, s̄pē numero cum toto populo veris Prophetis, qui eos ad piam reformationem hortabantur, simile responsum dederunt: Nō parebimus. Hoc graue nobis foret. Hoc non esset ē re nostra. Adeūdem Clericatus in Syria, in Græcia, in Hungaria, & aliis compluribus nationibus, quando Christiana Reformatio ab eo postulata fuit, tamdiu respondit, donec ignis furoris & vltionis diuinæ omnes ad vnum deuorauerit. Idem iudicium nostris quoque ceruicibus impendet. Dominus det ut tempus visitationis nostræ rectè agnoscamus, antequam diuturna ac benè promerita ira Dei in nos exardescat. Amen.

Tricesimasexta Accusatio.

De Reformatione monasteriorum.

C A P. C XXXVIII.

SV B hoc titulo taxant Aduersarij id quod in Libro positum est, nos velle, vt qui in monasteriis fuerint reperti idonei ad subeundam curam animarum, ad eam ordinentur, vt que qui in monasteria assumentur, pollicantur se velle sponte acquiescere, si quando ad Ecclesiarum aut alia ministeria necessaria & Christiana (hoc vocabulum Christiana, omiserunt Aduersarij in citatione horum verborum) requirantur.

At non ignorant Aduersarij, id antiquis Canonibus consentire, & à Patribus obseruatum fuisse. Etenim ex nullo genere hominum frequentius Ecclesiæ ministros desumperunt, quam ex Monasteriis.

At scribunt ad hoc opus fore magna discretione. Et adferunt ex quibusdam Conciliis nullum monachum ad Ecclesiæ ministerium ordinandum esse, qui vtrò monasterium suum deserit, sed illos tantum ad hoc assumendos, qui voluntatem & consensum Abbatis sui habent.

Quod verum est. At quæ est causa istius ordinationis? Certè nulla alia quam hæc, vt tantò probatores magisque idonei ministri Ecclesiis præfici possint. Iam verò Monasteria iamdudum ab antiqua verè monastica viuendi ratione tam longè recesserunt, tamque multis & superstitionis ac falsis cultibus conspurcata sunt, vt nemo Christianorum pia mente præditus in eiusmodi monastica vita, qualis nostris temporibus ac monasteriis est, tranquilla conscientia viuere possit: adeò ut deserere Monasteria in plurimis sit argumentum veræ pietatis & cognitionis Iesu

Iesu Christi, non dissolutionis. Plurimi etiam Abbates tanta imperitia vita & actionum diuinorum laborant, ut veris Ecclesiis Christi non sit licitum ipsorum testimonia consensumque in ordinatione ad ministerium Ecclesiasticum recipere, taceo, multum de eis querere.

Quamobrem cum in eum abusum Monasteria prolapsa sint, certè nihil aliud à nobis requiritur in tanta dissipatione, dissolutione & peruersione monasticae vitæ, sicut etiam, proh dolor! totius Clericatus, quam ut vndeunque possumus, tam ex monasteriis quam aliunde vbi cunque reperiri queunt, colligamus, & ad ministerium Ecclesiæ ordinemus, quicunque ad id idonei iudicantur. In eo enim summa rerum posita est, ut Ecclesiæ per verè Christianos & idoneos ministros administrentur, quorum hoc tempore horrenda inopia est: cui certè quām citissimè optimè fieri potest, subueniri debet.

Subiectunt Aduersarij hoc loco Monachos qui ad Ecclesiæ ministerium ordinantur, non debere à priori proposito recedere.

Quod èd referunt, ut eiusmodi Monachi nihilominus priora vota sua obseruent. Quod verum est, quatenus ea piè & ad prouectum ministerij Ecclesiastici obseruari possunt. Verum de votis Monasticis proprium articulum qui proximè sequitur, posuerunt, in quo latius ad obiectionem istam à nobis respondebitur.

De votis Monasticis.

Quo fuso conentur Aduersarij Monasticis votis patrocinari.

CAP. CXXXIX.



ONANTVR Aduersarij & scripturis & authoritate S. Patrum tueri, imò ex S. Scripturis se probasse prædicant, vota quę substancialia vocant, ut castitatis seu cœlibatus, obedientiæ item & paupertatis voluntariæ, hoc est abdicationis omnis proprij, traditionisque omnium priorum temporalium bonorum in manus Præpositorum in monasteriis.

Primum igitur videamus, quibus Scripturis, & quām firmiter ea comprobarint: Deinde causas assignemus, propter quas proposuimus ea abrogare.

Quo fuso conentur Aduersarij Monasticae vota probare.

Scribunt Dominum dixisse, Matth. 19. Sunt Eunuchi qui seipso castrauerūt propter regnum cœlorum. Qui potest capere capiat. Item ad diuitem iuuenem, Si vis esse perfectus, vade, vende omnia quę habes, & da pauperibus, & habebis thesaurum in regno cœlorum, & veniens sequere me. Quare castitatem, paupertatem & obedientiam vovere rem esse diuinam.

Hic perpende quæso, Christiane Lector, qualis ista connexio sit, Dominus dixit, sunt quidam Eunuchi, qui à coniugio abstinent propter